



**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհուրդ**

Ո Ր Ո Շ ՈՒ Մ

14 դեկտեմբերի 2015 թվականի

**Ուսանողական խորհրդի հաշվետվությունն ուսանողների
ուսումնադաստիարակչական, գիտահետազոտական, հայրենասիրական
դաստիարակության աշխատանքների մասին**

Լսելով և քննարկելով «Ուսանողական խորհրդի հաշվետվությունն ուսանողների ուսումնադաստիարակչական, գիտահետազոտական, հայրենասիրական դաստիարակության աշխատանքների մասին» հարցը (գեկուցող՝ ուսանողական խորհրդի նախագահ Ս.Ա.Խատատյան)՝ գիտական խորհուրդն արձանագրում է. 2015 թվականին ուսանողական խորհուրդը շարունակել է աշխատանքները՝ հավատարիմ մնալով իր սկզբունքներին: Ինչպես գործունեության ողջ ընթացքում, այնպես էլ այս տարի ուսանողական խորհրդի գերխնդիրը եղել է ուսանողների շահերի և իրավունքների պաշտպանությունը:

Անցնող տարում ուսանողական խորհուրդն արձանագրել է բազում ձեռքբերումներ ու հաջողություններ: 2015 թվականին Հայաստանի երիտասարդական հիմնադրամի կազմակերպած «Հայկյան» մրցանակաբաշխությանը, որին ներկա է եղել ՀՀ նախագահ Սերժ Սարգսյանը, Հայաստանի պետական տնտեսագիտական համալսարանի ուսանողական խորհուրդը չորրորդ տարին անընդմեջ հաղթող է ճանաչվել «Լավագույն ուսանողական ինքնակառավարման մարմին» անվանակարգում և արժանացել «Հայկյան» մրցանակի:

Ուսանողների քաղաքացիական-հայրենասիրական և իրավական դաստիարակությունն իրականացվել է հետևյալ ուղղություններով՝ մասնակցություն հայրենասիրական ծրագրերին ու միջոցառումներին, այցելություններ Հայաստանի պատմամշակութային վայրեր և թանգարաններ, ամենամյա հանդիպումներ ՀՀ պաշտպանության նախարարի հետ, ՀՀ պաշտպանության նախարարության աշխատակիցների հետ պարբերաբար այցելություններ տարբեր զորամասեր, սահմանային գոտիներ, երիտասարդության իրավական գրագիտության զարգացում և ընտրական ակտիվության մակարդակի բարձրացմանն ուղղված միջոցառումներ:

Ուսանողական խորհուրդն ակտիվ մասնակցություն է ունեցել Հայոց ցեղասպանության 100-ամյա տարելիցին նվիրված միջոցառումներին, որի շրջանակներում 250 ուսանող ներկա է գտնվել Մայր Աթոռ Սուրբ Էջմիածնում կայացած Հայոց ցեղասպանության անմեղ զոհերի սրբադասման արարողությանը, իսկ ապրիլի 24-ին ուսանողները մասնակցել են ամենամյա ջահերով երթին: «Նժդեհ» ռազմահայրենասիրական ակումբի նախաձեռնությամբ անցկացվել է «1.500.000 + 1» խորագրով բաց դաս՝ նվիրված Հրանտ Դինքին: Համալսարանի ուսանողական խորհրդի նախաձեռնությամբ և Հայաստանի երիտասարդական հիմնադրամի աջակցությամբ հրատարակվել է «Հատուցման գինը» (հեղինակ՝ համալսարանի ասպիրանտ Հայկ Բեջանյան) գիրքը: Գիրքը պատմատնտեսագիտական վերլուծություն է՝ նվիրված Հայոց ցեղասպանության ընթացքում հայ ժողովրդի կրած



նյութական կորուստներին: Ֆինանսական ֆակուլտետում ապրիլի 22-ին տեղի է ունեցել Անդրանիկ Օզանյանի անունը կրող լսարանի բացումը:

Նպատակ ունենալով բարձրացնել ու կատարելագործել ուսանողների մասնագիտական կարողությունները՝ ուսանողական խորհուրդը նախաձեռնել և իրականացրել է բազմապիսի կրթական և ուսումնագիտական ծրագրեր: Ապրիլի 17-19-ը համալսարանի ուսանողական խորհրդի և Հայաստանի երիտասարդական հիմնադրամի նախաձեռնությամբ Ծաղկածորում անցկացվել է «Հայաստանի Հանրապետության տնտեսական համակարգը. նորարարություն, զարգացում, իրագործում» խորագրով «InHead» միջբուհական ուսանողական գիտաժողովը: Գիտաժողովի երկրորդ օրը նիստին մասնակցել է ՀՀ վարչապետ, ՀՊՏՀ խորհրդի նախագահ Հովիկ Աբրահամյանը:

Օգոստոսի 22-ին Ծաղկածորում կայացել է «Բագե-2015» համահայկական երիտասարդական հավաքի փակման գալա-համերգը, որին ներկա է եղել ՀՀ նախագահ Սերժ Սարգսյանը: Հաղթող ճակատ է ճանաչվել կապույտը, որը և ներկայացնում էր ՀՊՏՀ ջոկատը:

ՀՀ անկախության 24-րդ տարեդարձին ընդառաջ՝ սեպտեմբերի 19-ին համալսարանում հյուրընկալվել և ռազմահայրենասիրական թեմաների շուրջ ուսանողների հետ զրուցել է ՀՀ պաշտպանության նախարար Սեյրան Օհանյանը:

Ուսանողական խորհրդի նախաձեռնությամբ, ՀՀ պաշտպանության նախարարության, Հայաստանի երիտասարդական հիմնադրամի աջակցությամբ համալսարանում բացվել է հրաձգարան:

Ինչպես նախորդ տարիներին, այնպես էլ հաշվետու տարում, ուսանողական խորհուրդը մասնակցել է Էրեբունի-Երևան տոնակատարությանը:

Երիտասարդության ընտրական ակտիվության մեծացման հետ կապված՝ համալսարանում հատուկ ուշադրություն է դարձվում ուսանողների իրավական դաստիարակությանը: Անցկացվել են ուսանողական ակտիվի հանդիպումներ իշխանության ներկայացուցիչների հետ, խորհրդակցություններ՝ նվիրված ընտրական իրավունքին, ընտրական պատասխանատվությանը և այլ հարցերի:

Հոկտեմբերին կայացել է «Smart» խորագիրը կրող միջբուհական-ուսանողական աշխատաժողովը, որը կազմակերպել էր ուսանողական խորհուրդը Հայաստանի երիտասարդական հիմնադրամի հետ համատեղ:

Ունեցած գիտելիքների շրջանակը մեծացնելու և նոր գիտելիքներ ձեռք բերելու նպատակով ողջ տարվա ընթացքում կազմակերպվել են բաց դասեր, որի շրջանակներում բուհում հյուրընկալվել և գործնական բանախոսություններով են հանդես եկել «Իմեքս Գրուպ» ՍՊԸ, «Իդեալ համակարգի», «Ռոսգոստրախ-Արմենիա» ԱՓԲԸ, «ՊրոԿրեդիտ Բանկ» ՓԲԸ, «Բիլայն Արմենիա» ՓԲԸ և հանրապետության այլ առաջատար ընկերությունների ներկայացուցիչներ:

Տարվա ընթացքում կազմակերպվել են բազմապիսի ռազմահայրենասիրական միջոցառումներ: Հունվարին սահմանին տիրող լարված իավիճակի պայմաններում, ուսանողներն այցելել են Հյուսիսարևելյան ուղղությամբ տեղակայված զորամասերից մեկը և այնտեղ նշել «Հայոց բանակի օրը»: Ապրիլի 13-ին ուսանողական խորհրդի և «Բաղրամյան» զորավարժարանի միջև կնքվել է համագործակցության հուշագիր, իսկ մայիսին կազմակերպվել է 3-օրյա բանակում-ճամբար ազատագրված Քարվաճառում:

Անցնող տարվա ընթացքում ամրապնդվել են կապերը նաև արտերկրի ուսանողական կազմակերպությունների հետ: Լինելով Ուսանողական ազգային ասոցիացիայի հիմնադիր անդամ՝ ՀՊՏՀ ուսանողական խորհուրդը անդամակցում է ուսանողական մի շարք ծրագրերի: Դրանց շրջանակներում նախորդ տարի համալսարանի 10-ից ավելի ուսանողներ եղել են Եվրոպական տարբեր երկրներում, ծանոթացել կրթության կազմակերպման սկզբունքներին, ուսանողական ինքնակառավարման և կրթական պրոցեսի բարելավմանն ուղղված քայլերին, ինչպես նաև մասնակցել միջազգային գիտաժողովների և ներկայացրել զեկուցումներ:

Մարտին տեղի է ունեցել բանավեճ-քննարկում ուսանողների և ռեկտորատի ներկայացուցիչների միջև: Ուսանողները ներկայացրել են ուսանողների շրջանում անցկացված սոցիալական հարցման արդյունքները՝ առաջարկելով իրենց նախագծած լուծումները:

Ուսխորհրդականները կանոնավոր կերպով այցելել են սոցիալական տարբեր հաստատություններ՝ մանկատներ, ծերանոցներ: Ուսանողական խորհրդի մշտական ուշադրության կենտրոնում է գտնվել սոցիալապես խոցելի ուսանողներին ցուցաբերվող աջակցությունը: Հաշվետու տարում ուսանողական խորհրդի նախաձեռնությամբ և միջնորդությամբ շուրջ 150 ուսանողներ արժանացել են Հայաստանի երիտասարդական հիմնադրամի, Հայ օգնության ֆոնդի և այլ հիմնադրամների կրթաթոշակների: Ուսանողական խորհուրդը ՀԵՀ-ի հետ համատեղ կազմակերպել է նաև սահմանապահ համայնքների ուսանողների ուսման վարձի փոխհատուցման ծրագրի իրականացումը:

Ողջ տարվա ընթացքում ուսխորհրդականները պարբերաբար եղել են նաև «Տնտեսագետ» ուսանողի տանը, եղել այնտեղի բնակիչների կողքին և սատար կանգնել զանազան խնդիրների լուծման հարցում:

Կարևոր տեղ են զբաղեցնում նաև մարզական և մշակութային միջոցառումները: Առողջ ապրելակերպի քարոզման և ուսանողական կյանքը առավել հետաքրքիր դարձնելու նպատակով արդեն ավանդույթ է դարձել «Ուսանողական ամառ», «Ուսանողական աշուն» և «Ուսանողական գարուն» մարզամշակութային փառատոնների անցկացումը: Կազմակերպվում են մրցույթներ բոլոր մարզաձևերից: Կարևոր ձեռքբերումներից էր նաև հոկտեմբերին կազմակերպված Եվրոպայի շախմատի ուսանողական առաջնությունը, որի հիմնական կազմակերպիչներից մեկն էլ ՀՊՏՀ ուսանողական խորհուրդն էր:

Այս տարի յուրօրինակ ձևով է կազմակերպվել «Ուսանողական ամառ-2015» մարզամշակութային փառատոնը, որն անցկացվել է Դիլիջանի մարզաառողջարանում: ՀՊՏՀ 6 ֆակուլտետները և Եղեգնաձորի մասնաճյուղը ներկայացնող ջոկատներից յուրաքանչյուրը կրում էր ՀՀ ազգային հերոսներից մեկի անունը: 7 օր շարունակ ջոկատները պայքարել են լավագույնի տիտղոսի համար՝ յուրօրինակ ձևով համատեղելով առողջ ապրելակերպը, ուսանողական հանգիստն ու անմոռանալի հիշողությունները: Փառատոնի վերջին օրը ճամբարականներին հյուրընկալվել են ՀՀ ԿԳ նախարար Արմեն Աշոտյանը, ՀԵՀ հոգաբարձուների խորհրդի համակարգող Կարեն Ավագյանը, ԵՊՀ ռեկտոր Արամ Սիմոնյանը և այլ պաշտոնատար հյուրեր:

Ուսանողական խորհուրդը ուշադրություն է դարձնում նաև ուսանողների ազատ ժամանցի կազմակերպմանն ու անցկացմանը: Կազմակերպվում են բազմաբնույթ

կինոդիտումներ, մշակութային երեկոներ, տոնական համերգներ ու ծրագրեր: Ավանդաբար անցկացվում են զանգվածային միջոցառումներ՝ «ՀՊՏՀ շրջանավարտի օր», «Գիտելիքի օր», «Առաջին կուրսեցու օր»: Ուսանողների համախմբմանը, ուսանողական մշակույթի ձևավորմանը նպաստում է համատեղ հանգստի կազմակերպումը. ուսանողական խորհրդի նախաձեռնությամբ այս տարի ուսանողներն իրենց ձմեռային արձակուրդի մի մասն անցկացրել են Ծաղկաձորում, իսկ ամառային հանգիստը՝ Դիլիջանի «Տնտեսագետ» մարզաառողջարանում:

Ելնելով վերոնշյալից՝ համալսարանի գիտական խորհուրդը **որոշում է.**

1. Ուսանողական խորհրդի կատարած աշխատանքը գնահատել բավարար:

2. Առաջարկել ուսանողական խորհրդին՝

- 1) սերտորեն համագործակցել ռեկտորատի, դեկանատների և ամբիոնների հետ ուսումնագիտական և ուսումնադաստիարակչական աշխատանքներում.
- 2) ուսանողության շրջանում պարբերաբար անցկացնել սոցիոլոգիական հարցումներ և արդյունքները ներկայացնել ռեկտորատի քննարկմանը.
- 3) ավելի մեծ ուշադրություն դարձնել սոցիալապես խոցելի խմբերի ուսանողներին ցուցաբերվող աջակցությանը.
- 4) ձեռնարկել միջոցառումներ ուսանողների կարգապահության ամրապնդման ուղղությամբ.
- 5) առավել ակտիվորեն կազմակերպել դաստիարակչական, ազգային, հայրենասիրական բնույթի միջոցառումները.
- 6) առանձնահատուկ ուշադրություն դարձնել առաջին կուրսեցիների հետ կատարվող աշխատանքներին.
- 7) ակտիվորեն համագործակցել Գյումրու և Եղեգնաձորի մասնաճյուղերի ուսանողական խորհուրդների հետ.
- 8) ակտիվացնել համագործակցությունը արտերկրի համանման երիտասարդական կազմակերպությունների հետ.
- 9) համագործակցել համալսարանի հենակետային ավագ դպրոցների հետ:

3. Սույն որոշման կատարման նկատմամբ պատասխանատվությունը վերապահել ուսանողական խորհրդի նախագահ Ս.Ա.Խառատյանին:

Գիտական խորհրդի նախագահ

Կ. Լ. Աթոյան

14.12.2015 թ.